

四庫全書

史部

欽定四庫全書

史部

平定兩金川方略卷一百十九至二十一

給事中臣查善長覆勘

總校官原任侍講臣王燕緒

欽定四庫全書

平定兩金川方略卷一百十九

五月甲子明亮舒常奏言查基本斯丹當噶右手
山根一道名札烏古上通甲索山梁下至河沿橫
絕去路官兵難以仰攻轉須由甲索巴舍什下壓
曲碩木若乘勢掃除巴布里巴克札一帶礮卡槍
佔札烏古山梁則溝內各寨皆可迎刃而解隨於
初三日抽調漢土官兵派令奎林和隆武等昏夜

起程由達爾圖山梁遠行使賊不及知覺約於初五日分作數路猝行進攻並密札教成即在甲索挑派壯勇數百順梁下壓同時夾攻是夜風雨大作至初六日不止嗣於初六日據教成稟稱初五日統兵直抵巴布里山脊礮下旋見大雪復作我兵勢難再退隨即繞出賊礮後面截住圍攻一面先將左右卡隘四座立時搶佔其礮內賊人分頭逃逸被官兵殺死十餘名_臣等查甲索山勢自最

高峯頂下至沿河綿延三四十里其南面另起山
梁一道更為高峻即名乃當亦係甲索分支所有
殘敗各番俱結聚於此以圖自固臣等現擬掃淨
曲碩木沿山一帶賊境即另為設法辦理務期克
此札烏古一道山梁則勒烏圍隔河甚近更不難
一舉成功再查自宜喜克捷以來所得地方甚廣
臣等現將後路各要隘自覺木交至宜喜山梁派
令李時擴專管自得楞以上至達爾圖山梁並木

克什巴舍什等處派令董果管理自得楞以下直
至前敵各營盤派令馬彪專管庶分開段落各有
責成而防守益昭慎重奏入

上諭軍機大臣曰明亮等奏攻獲巴布里地方碉卡殺
賊情形教成於大雪中奮勇攻克賊碉追殺賊衆甚
屬可嘉著明亮等查明出力之弁兵一併咨部議叙
又所奏自覺木交起至宜喜山梁派令李時擴專管
恐尚不足特宜喜軍營原留馬彪都爾甲帶兵防駐應

令馬彪都爾甲妥協嚴防毋稍疎懈

丁卯富德奏言本月初五日據駐防布咱納副都
統札爾桑報稱本日辰刻有賊番在前敵喊叫將
索諾木兄弟等稟帖夾於樹枝插地遁入碉卡土
兵等取回呈報臣譯其稟詞閃爍明係因各路大
兵夾攻甚急設為詐謀搖動我兵恃此路山險欲
賊衆撤往西北兩路以圖抵拒臣又近訊得脫出
小金川番民撒木卡供稱逆酋等商議現今西北

兩路大兵甚多攻圍實屬利害惟南路大兵尚少
莫若選派番衆潛往馬尼駱駝溝等處將大兵後
路斷截搶佔糧食火藥再向西北兩路求降自然
必准等語伏思逆酋滅亡在即尚敢逞鬼蜮伎倆
欲行滋擾後路殊堪髮指臣已抽撥官兵二三百
名派侍衛章京等帶領前往馬尼駱駝溝後路一
帶協防奏入

上諭軍機大臣曰富德奏抽撥官兵二三百名前往馬

尼駱駝溝一帶協防富德一路現兵甚少只可俟阿
桂明亮等攻克勒烏圍時分兵往會夾攻馬爾邦引
進南路之兵會攻噶拉依自更得力又所奏逆首索
諾木弟兄遣賊番在卡外喊叫投稟譯出稟詞進呈
今閱其稟內所稱懇求大皇帝在我們地方上也照
西藏一帶安大人官兵等語金川番衆譬猶蟲蟻一
般乃妄思比之西藏佛地況逆酋兄弟罪大惡極斷
難輕宥何得尚冀如西藏之加恩照料是其心不知

悔罪且敢如此措詞狂誕將來蕩平噶拉依不但其
大小頭人不可寬減即散番中之稍覺桀驁者亦當
察明正法以靖凶孽著將此傳諭阿桂等知之

同日富勒渾劉秉恬奏言查楸砮日爾拉大板昭
一帶雖係西路糧運正路但西路兵夫需糧倍多

上年秋冬間

臣等

奏請開通別思滿一路餉道協供始堪接濟是一路
專供一路軍糧尚須分途協運今以一路分供兩

路恐不足深恃計西北兩路兵夫每日約需米一
千餘石加以軍裝軍火絡繹趕運設專恃日爾拉
一路或有不繼關係非淺且北路之夫仍須添安
西路一經調撥奔涉數百里道路之間零星逃散
恐北路之夫盡歸烏有而西路各站亦難得實濟
況北路卓克采等處久經派定商米現已趕運在
途輾轉改撥倘商夫等觀望不前更不免有夫逃
米失之事臣等悉心熟籌兩軍現已會合北路軍

營之糧自應將北路巴爾康從噶克至得楞十五站盡行裁撤其自卓克采至達斯滿十三站應仍照舊安設即由腊覺溝孟拜拉接添兩站運交色木多會合西路俾站夫商米既無庸另事更張而分路運供尤歸妥速其從噶克一帶所裁夫數添安色木多以前及新設各站亦屬有減無增不致糜費奏入

上諭軍機大臣曰前據鄂寶等奏西北兩路大兵會合

所有糧運臺站應行歸併一路已經批准允行今據
富勒渾劉秉恬奏稱請將自卓克采至達斯滿十三
站仍照舊安設等語富勒渾等就情形通盤合計較
之鄂寶所籌尤為周到所有卓克采一帶糧臺著照
所奏仍行酌留並即諭令鄂寶文綬等一體妥為辦
理

戊辰阿桂豐昇額海蘭察額森特奏言查第三條
山腿將至平壩為赤布寨有戰碉七座回環互守

必須攻克此寨則直下河干始無阻碍臣等於初
八日寅刻派兵進攻至巳刻未能得手但赤布寨
之北為得思古寨自高而下碉寨雖多若出其不
意不難奪取而既取得思古寨順溝下至瀕河則
噶朗噶及噶爾丹寺亦俱攔截在內與從赤布寨
而下形勢無殊當將官兵酌撤至申酉間沿溝潛
進突然攻搶賊人放鎗抵禦而官兵業已分頭搶
入遂將得思古各寨均行佔住其得思古寨迤而

西北尚有寨落數處初九日乘勢攻獲而五福等亦從安吉山腿迤邐下攻克取大寨二座因思赤布寨在山腿盡處形勢甚陡今官兵既克得思古寨可以抄出其後因於初十日前後合攻將赤布寨即行政獲是日各領隊等又即帶兵將噶爾丹寺南面寨落三處相繼攻克而五岱等又將噶爾丹寺東面寨落並水碓一併攻得至戌刻風雨雪霰交作賊人黑夜奔逃官兵設伏防範賊為鎗箭

所斃者不少比至天明即將其寺焚燒以絕奔布爾邪教至遜克爾宗左手有舍圖枉卡山腿一條其上碉卡排列聯絡接應臣等於初七日派兵六路進攻該處山梁陡峻樹木叢深初八日丑刻各官兵潛密無聲分路進發章京巴彥泰等將最上三碉圍住分頭撲進儘力砍殺賊人無一得脫遊擊普吉保等攻中間第四碉並碉外木城亦立時摧破而李文英傅宗孔高塔張顯揚分攻第二第

三碉英林等攻了口上木城並平房二十餘間亦俱相繼克獲富興成德等又乘勢搶其大碉五座木城二座但此了口中間尚有碉卡三座為官兵下壓所必經一從了口而下則遜克爾宗之賊勢必望風奔潰官兵又添一進搗勒烏圍之路查噶爾丹寺本係金川著名地方而噶朗噶尤為賊人最大聚落今官兵竭三日四夜之力將噶朗噶一帶寨落一百十餘處戰碉三十餘座寨房二千餘

間盡行奪獲掃除而噶爾丹寺亦不攻自潰前至
勒烏圍不過數里現在趕緊添斡木柵直至河沿
即與明亮基木斯丹當噶新營隔河相對其榮噶
爾博第八九峯賊雖死力拒守然山上山下皆可
覓路進兵臣等相度機宜惟期迅速集事先掃勒
烏圍巢穴以慰

宵旰殷懷奏入

上諭內閣曰阿桂等此次攻克噶爾丹寺噶朗噶等碉寨

將軍叅贊調度有方領隊大臣奮勉出力甚屬可嘉
俟即日攻得勒烏圍後一併優叙至在事之將佐弁
兵並著阿桂等查明咨部分別議叙

上諭軍機大臣曰官兵全克噶爾丹寺及噶朗噶各寨
現距勒烏圍不過數里兩路夾攻不能久拒但賊人
平日業將各處糧食什物運往噶拉依恐尚欲恃為
負隅固守之計今官兵乘勝進攻一得勒烏圍賊衆
必相率竄回噶拉依巢窟現在明亮帶兵迤駐河干

若望見隔河賊衆陸續潰竄即當酌用鎗礮在對河
截擊使賊衆無所免脫至該處所有喇嘛黨助逆首
念經逞術情甚可惡除臨戰殲殪外其餘大小喇嘛
均不應稍存姑息並著將軍等查明應正法者正法
其餘概行鎖押解京聽候訊明辦理

臣等謹案大兵攻克噶爾丹寺各碉寨已密迺
勒烏圍自此直至河邊與明亮基木斯丹當噶
新營隔岸相對合力夾擊賊自不支而往來奔

潰急宜遏其逃竄之路我

皇上洞燭軍情以明亮近駐河干望見賊衆潰竄即當
用鎗礮對河截擊使其喙走無由不數日而軍營奏
到籌辦情形一一適如符契師行機要何莫非

宸算先周歟

壬申明亮舒常奏言自巴舍什下掃曲碩木一帶
碉寨官兵暫因雨阻至初七日天氣放晴當即派
兵分為三隊臣等由基木斯丹當噶迤西山腿前

進為夾擊之勢其時奎林督率官兵將大戰礮兩處速行攻克和隆武所攻礮寨賊人捨死衝出希圖脫圍而逸被殺者亦有十餘名兩路官兵會同珠爾格德直下溝底其納木迪等處賊人紛紛來援俱由基木斯丹當噶山腿礮下經過被全保隊內鎗箭所斃者甚多餘俱分竄至初九日夜有賊百餘人來擾荊州駐防營盤又於十一日夜潛至如寨買賣街上搶劫並經我兵迎擊殲戮餘俱逃

竄先是臣等准阿桂札西路官兵擊柵直至山腿
盡處而崖礪之下沿河或可行走令於隔河排列
鎗礮攢打使賊人斷絕往來臣等當即派令都司
衆神保在對岸趕築礮臺日夜轟摧又派屯土兵
用贊布拉烏鎗隔河擊打來往賊人茲阿桂已將
噶爾丹寺及左右寨落盡已勦洗則如寨對河賊
已絕迹往來於後路更為嚴密現因天雨滂沱日
夜不止俟少見晴霽臣等即當整頓兵力迅速進

攻奏入

上諭軍機大臣曰明亮等奏由巴舍什分路進攻奪取賊碉所辦尚好賊人當窮蹙之時仍敢夤夜潛出連擾營卡此時功逮垂成諸宜倍加謹慎勿稍疎懈至所稱派都司衆神保在對岸趕築礮臺晝夜轟摧并派屯土兵用烏鎗擊打籌辦甚是前曾計及官兵攻打勒烏圍時諭令明亮於隔河用鎗礮截擊以斷賊人歸路今明亮等所奏情形與朕前旨恰合惟當努

力妥為之至平定金川以後一切善後事宜亦需經費今諭戶部再撥庫帑五百萬兩此事辦成實屬一勞永逸雖多費亦所不靳

癸酉

上諭軍機大臣曰前曾諭令將軍等於掃蕩賊巢時將該處所有喇嘛除在彼正法外其為首及罪大者俱解京嚴行訊辦金川與綽斯甲布向來俱奉奔布爾喇嘛教恐綽斯甲布土司念同教之故見將軍欲將

衆喇嘛正法為之求饒莫若將所有喇嘛除臨陣殲戮外其就擒及投出者俱派妥員管押來京辦理

甲戌鄂寶顏希深奏言臣等前此奏請將北路軍

糧改歸西路原以舍遠就近既可不致虛糜即以

此路裁撤之夫撥添西路亦屬易於集事並非以

一路之夫責令運供兩路之糧今接到督臣富勒

渾劉秉恬移送奏稿請將達斯滿至卓克采等站

照舊安設并於卓克采添安措覺溝孟拜拉等站

接運是較之由楸砥大板昭一帶輓運計程已多
四站且現在應裁者僅止十三站而應添人夫轉
有十四站之多是欲期節省轉致糜費臣等親歷
其地公同商酌似應仍照臣前奏將此路軍糧改
由楸砥孟谷日爾拉大板昭一帶至密拉噶拉木
取道勒吉爾博得式梯茹寨即可直抵基木斯丹
當噶較為省便奏入

上諭軍機大臣曰前據鄂寶顏希深奏撤站加夫各事

宜業已允行嗣據富勒渾劉秉恬奏將原有糧臺酌留十三站俾分路運供所籌似更周密是以即照所奏諭令妥辦今鄂寶等仍請照前奏辦理或果係各站實在情形或不免拘泥前奏意存迴護富勒渾劉秉恬如確見前奏存留十三站及添設二站之處供運萬妥原不必因鄂寶之說輕事更張若鄂寶等所奏實屬省便當行則又不可偏執已見致悞軍儲要務總之此事功過皆富勒渾劉秉恬任之如稍有未妥

惟伊二人是問此時俱屬空言難以折衷歸一著阿桂將富勒渾劉秉恬及鄂寶顏希深兩路奏事之處孰得孰失秉公據實查奏

乙亥阿桂豐昇額海蘭察額森特奏言查官兵佔據舍圖枉卡已屬居高得勢自此而下有丫口一處山勢陡削賊人木城石卡互為聯絡上下俱可接應臣等籌定分兵兩隊當派令總兵成德等統越自下截攻遊擊普吉保等從上下壓而富興等

帶兵接續雖雨勢未晴霧氣四塞成德等已於林
箐叢密崖礪歌仄之間步步攀越而行潛抵了口
以下突起力攻賊人分頭抵禦普吉保等即領兵
衝壓上下合擊士氣百倍立將了口上下之石碉
八座木城四座悉行攻克其下尚有碉寨二座平
房二十餘間一併搶佔查遜克爾宗在榮噶爾博
山陽第七峯之後恐賊人尚可從榮噶爾博山陽
沿溝來往後路未絕隨派曹順領土兵循山陽而

下放鎗縱火與臣豐昇額之兵互為犄角臣豐昇

額思官兵將次合圍遜克爾宗賊人必行竄逸又

即分兵三路合力並進賊人勢不能支由寨後牆

穴往外奔竄經官兵緊追擊斃餘俱滾落箐林坡

礮遂將石寨六處石碉十二座平房七處亦皆克

取查由遜克爾宗前抵勒烏圍道路尚遙亦多山

溝間阻臣等公同商議榮噶爾博距勒烏圍不過

數里現已於直古腦一帶為併力進攻之計其第

三條山腿必須於逼近賊人處所添斫木柵直至河邊始可酌撤後面之兵以供前進之用今自十四日酉刻臣等督率官兵已將第三條山腿上之柵均行擊起並將五岱等勒吉爾博之兵撤至第三條山腿換出臣海蘭察額森特之兵併力前進至榮噶爾博之第八九峯地形既險守禦更堅臣等一面令烏什哈達循梁斫柵近逼用礮轟其正面礮卡以資牽綴又相度第八九峯下小山腿上

之各碉卡雖亦地險而堅若從半山擊柵踰溝前
進用礮轟摧尚可攻克得一處即可斜上八九
峯後攻搶巴占地方則不但八九峯之賊不能復
守即前抵勒烏圍亦更無阻碍現將應用木植砍
伐運往將次敷用即於日內相機進取奏入

上諭內閣曰遜克爾宗一帶我兵攻取年餘尚未得手
若不將此處攻克後路究未掃淨今豐昇額全行奪
取實為奮勉出衆豐昇額乃額宜都巴圖魯之孫其

果毅公爵即係額宜都傳襲前將軍兆惠因平定準噶爾回部曾於公爵上加封四字今豐昇額能繼其祖著於果毅字下再加繼勇二字以示優獎

上又諭內閣曰阿桂等奏攻得遜克爾宗碉寨甚多現籌從榮噶爾博進兵直搗勒烏圍賊巢所辦甚好遜克爾宗為金川緊要後路今將所有碉卡盡行攻克則西路官兵後路更覺清肅深為欣悅此次攻碉得勝係豐昇額帶兵奮勇所致甚屬可嘉已另降諭旨

優獎總兵成德遊擊普吉保亦俱勇往超羣各立功績統俟攻得勒烏圍時交部一併優叙遊擊普吉保著加恩以副將用遇缺即補其餘在事出力之將佐弁兵並著阿桂查明交部議叙

上諭軍機大臣曰阿桂等奏自榮噶爾博由直古腦一帶擊柵下壓固屬得勢但閱圖內情形若由赤布寨至冷角寺沿河直進迺抵勒烏圍似較直捷著詢問阿桂此旨到時如勒烏圍尚未攻克或照此籌辦如

何又曹順屢次出力自應格外加恩除交軍機處以
總兵記名外著傳諭阿桂如軍營遇有總兵缺奏請
陞補

丙子

上諭軍機大臣曰噶爾丹寺為金川第一大廟喇嘛衆
多莎羅奔在彼聚集念經已久意在詛呪官兵其地
必有鎮壓之物阿桂等當留心察驗於寺基內外及
附近方圓地面如有可疑形迹即行刨挖刨得鎮物

即速投之水火以破其法此等原屬邪不勝正本無能為今若掘發而盡除之自足使人心暢快設或無實跡可憑即將寺内外地皮刨起數尺遇有木石等物形迹可疑者悉行取出焚燒亦足以釋衆人之疑而壯其膽於進兵自更有益

六月辛巳明亮舒常奏言查甲索下山腿直插河流橫截去路若從教成所駐頭敵統衆前進彼處林密山深後路極為散漫非現有兵力所可輕試

是以擬從曲碩木下壓即可徑攻扎烏古山梁以圖佔據形勢今賊番既已防備甚嚴一時難以覓間自沿河而往則基木斯丹當噶迤邐而下尚有旁分山腿一道賊番卡隘周密即使繞過山腿而向南一帶平坡數百處碉房寨落錯布其間官兵四面受敵惟查另有額爾替一山上與基木斯丹當噶相連下界平坡如能攻克則克爾瑪斯底葉安等處皆已失其險要但賊人在此山頂前則設

立石城周圍木柵其外深挖濠溝旁有戰碉擁衛
其後復安大石卡戰碉各一座為併力聚守之計
臣等察看情形非力取此地不能得手隨派德赫
布等由右手壓梁以防曲碩木賊人救援之路舒
景安等由左手壓梁以防克爾瑪斯底葉安賊人
救援之路隨令和隆武等攻其前奎林等攻其後
於十九日黎明分隊前進和隆武所領官兵呼聲
並起搶近石城賊衆鎗石如雨遊擊范宜申當即

陣亡我兵力攻愈急奪取兩碉賊番全行殺斃其
時左右兩旁之賊捨死來援俱為德赫布舒景安
等四面截殺旋即潰竄至奎林所攻石卡戰碉因
賊番救援愈聚愈多俱竄入碉內抵死拒守攻至
未刻臣等恐致多傷令官兵撤回其所得地方趕
拏木城派兵駐守現運大礮轟摧未得之碉卡俟
少有殘毀即乘勢搶奪由此下拏木柵十五六座
即穿過平坡搗其腹心無難立破奏入

上諭軍機大臣曰明亮等進攻額爾替山梁搶奪石城
碉座並痛殲賊衆雖未能即行攻克亦足以壯官軍
聲勢而破賊人之膽此次和隆武所領之衆尤為出
力明亮當查明記檔俟攻得勒烏圍一併交部議叙
至遊擊范宜申身冒鎗石踴躍直前以致陣亡甚為
可憫著查其有無子嗣另行加恩現今大功告成在
邇凱旋後當照平定準部回部之例於紫光閣圖畫
功臣像並繪戰圖以垂示永久番地山川險隘之處

未能悉其形勢難於著筆著傳諭阿桂將節次打仗
攻獲之賊寨如近時攻得之遜克爾宗及前此攻得
之谷噶喇穆喇穆色湖普康薩爾木思工噶克等及
明亮一路之達爾圖至茹寨一帶凡有經將士等實
在出力奮勇勦殺而得者查明各畫一圖並將帶兵
大臣及勇銳將領於圖內注明附便進呈俟朕閱定
同日明亮舒常又奏言綽斯甲布草布什咱兩處
頭人土兵自進攻得楞以來出力者甚衆此次搶

奪額爾替地方復爭先競奮其尤為出色者有綽
斯甲布頭人僧格爾結草布什咱頭人松邦租普
己賞戴花翎草布什咱頭人勒爾悟結己賞戴藍
翎其餘尚有出力者俱量加土千總把總職銜以
示鼓勵奏入報

聞

平定兩金川方畧卷一百十九

欽定四庫全書

平定兩金川方畧卷一百二十

六月壬午阿桂豐昇額海蘭察額森特奏言查榮
噶爾博八九峰下有山腿二條其第二條之丫口
即係巴占碉寨甚為堅大皆有木城連絡護衛必
須挈柵佔住第一條山腿然後用礮轟摧第二條
丫口之巴占寨始能分兵攻搶各木城併力直取
巴占臣等因木植業俱陸續砍運足數應用遂公

同籌議

臣

海蘭察督同烏什哈達等循榮噶爾博

第七峯山梁挈柵進逼攻其正面碉卡

臣

額森特

督同瑚尼爾圖等進攻巴占碉寨使賊不能撓我

挈柵之兵普爾普額爾特官達色等督兵踰溝趕

挈木柵而福康安彰靄泰斐英阿帶兵為各處策

應十九日丑刻海蘭察等循榮噶爾博山梁前進

將至天明林箐中見有賊番分為兩股從左右抄

下繞截海蘭察即派弓箭烏鎗預備及賊番直前

衝突官兵各持滿以待相距數步始一齊施發殲
斃甚多額森特等進攻已占賊人兩次衝突均被
官兵擊敗竄回維時普爾普等隨趕挈木柵二十
六座已佔至第八峯山腿而烏什哈達等亦挈柵
前進佔據兩山岡直逼第八峯用礮轟摧至我兵
所佔第八峯山腿已與巴占碉寨對面相去僅一
箭之地是日即將大礮運往力轟頗有塌損臣等
隨于二十三日寅刻派兵踴躍齊進詎巴占碉寨

之下各挖有深濶濠溝賊既潛伏其中以避大礮
並即於官兵攻撲時放鎗上擊其溝沿之上又有
砍倒樹木縱橫攔截官兵將至溝邊賊人鎗石如
雨攻至天明勢難即克一面將各官兵暫撤一面
將礮位對準施放共見寨內之賊有被轟捲去者
其五岱五福等帶兵沿河前進克獲賊碉一座隨
即拆毀查第八九峯據勒烏圍之頂故賊人踞此
以護賊巢然官兵若從其下山腿發兵繞進則第

八九峯佔據無益而勒烏圍仍不可守故賊於巴
占死力抵拒又為護八九峯之計臣等熟察情形
此時官兵所佔第八峯下山腿形勢稍低對面轟
摧往往為高礮所阻未能十分得力現已督率官
兵挈柵逼至巴占碉寨之上峯頂之下中間接擊
四座將礮運往力轟非獨摧擊巴占倍為有力而
斜逆而下既可擊巴占後面之寨並可擊前面溝
中藏匿之賊勢必難於存住若派兵或二三百名

或三四百名晝夜搶撲使賊人不能稍為歇息不
過數日必至疲困現於二十四日未刻令普爾普
帶兵進撲而額爾特繼之本日寅刻又令額爾特
進撲而額爾普繼之烏什哈達等亦由正梁時時
進攻總使我兵不致多傷賊人接應不暇察其稍
有懈弛遂派精銳官兵為一舉必克之計奏入

上諭軍機大臣曰官兵從榮噶爾博第八峯並巴占碉
寨進攻現已用礮轟摧并派將領每日更番帶兵搶

撲以疲其力賊衆自難久于存住即偶因風雨畧羈
時日亦無足慮現又添撥部庫銀五百萬解川貯備
軍需儘屬寬餘阿桂等惟當努力攻勦速成大功以
膺茂賞至逆首索諾木兄弟及黨惡之大頭人如丹
巴沃咱爾等自揣罪重難逃法網必然捨死抵禦但
未必如山東逆匪王倫之情急自焚或於進攻噶拉
依時將軍等乘其窘迫誘諭招降逆首未必不妄冀
倖免如果來投亦可稍省我兵攻圍之力而逆首仍

無所逃罪所謂兵不厭詐原屬無妨阿桂等酌量行之但不可入於賊詭計耳

臣等謹案逆首索諾木兄弟抗命稔惡逆黨頭人丹巴沃咱爾等助虐怙終均屬覆載不容萬無倖逃誅殛之理其貪生視息不肯自戕蓋

王法所必加亦

天網所難漏非獨番人情性然也伏讀

皇上訓諭於大兵攻壓賊巢之際即計其窮威苟延

未必情急自焚可以誘令亡降稍省攻圍之力
逮既克勒烏圍後我軍霆擊風馳賊益窘迫凶
渠逆黨等果皆相繼投出俘獲解京明正刑章
寸磔示儆一一如

聖諭所料云

乙酉

上諭軍機大臣曰富德在絨布一路原不過為牽綴賊
勢之計未必即能攻進此時亦不宜輕舉妄動俟阿

桂明亮攻至噶拉依其南路一帶之賊自必窘迫富德若察見馬爾邦等處賊人有抽撤慌亂情形即相機設法打進又可添一路攻勒噶拉依自屬有益富德亦可借此立功務當努力

己丑阿桂豐昇額海蘭察額森特奏言

臣

等令福

康安普爾普瑚尼爾圖額爾特等於二十五日酉刻帶兵分路進攻已占寨落並及其下之兩木城詎賊人守禦嚴密

臣

海蘭察額森特因于二十六

日丑刻分為兩隊進攻而賊人自第九峯下以至
寨外挖成溝濠甚為深濶溝內密布松籤多伏賊
番放鎗擊打而距巴占稍遠之賊又用礮擊我攻
寨之兵峯上賊人又滾放石塊官兵難於站立漸
次撤回臣等思若再挈柵直逼第八峯之下并從
第七峯丫口挈柵橫截與第八峯之木柵相聯則
山峯上鎗石不能下及庶正面攻打官兵既易為
力且即從山腿橫挈木柵直至第九峯下則壕內

之賊不能存立然後順梁下壓合力進取可期必
克該處地方險峻必須一氣趕拏臣等現已督兵
砍伐木植將次數用至沿河山勢自八九峯下至
冷角寺中間尚有山腿兩條賊人各有木城若從
沿河直上攻佔亦屬可辦但河西沙爾尼一帶碉
寨明亮處尚未掃除我兵從此進攻則河西之賊
皆可隔河施放鎗礮以擾我河東之兵臣等察看
形勢若明亮處移往礮位由河西自上下轟沙爾

尼碣寨

臣

等并令五岱在伊現駐之赤布寨以前

趕挈木柵運送大礮前往隔河平打前後夾擊賊

必不能存站則沙爾尼一帶更易掃淨而河東一

帶亦可由河沿乘機攻取并可從冷角寺山梁進

搗賊巢總之山上山下不論何處得手均可直抵

勒烏圍

同日明亮舒常奏言前月十九日發兵從額爾替

進攻將賊人在前石城戰碣先行奪取其後所

立碉卡與我兵新駐前敵相距不遠賊人因地當
緊要又加築木城一座以圖固守臣等挑集滿漢
屯土官兵分為左右兩翼定于二十九日並進詎
是夜有賊百餘人另抄小路由基木斯丹當噶山
腰來劫外委陳清營卡我兵竭力相持而上下附
近各營俱已聞聲赴救殺賊十餘人將及黎明始
行紛紛四竄其時奎林和隆武領兩隊官兵已直
抵賊番頭敵賊雖四面拒戰見我兵勇銳均即奔

逃我兵盡力窮追除滾跌崖礪及為鎗箭所傷外
共割獻首級三顆耳記十三個隨即派兵東向平
坡之下趕立木柵四座其前寨落雖甚稠密而既
已搃其腹心即不難逐漸進逼盡行掃蕩至德赫
布等帶兵在左手壓梁其曲碩木一路賊人攢集
多衆向前衝突被官兵斃賊八名旋即解散均奏
入

上諭軍機大臣曰阿桂等奏連次攻打巴占碉寨尚未

能克賊人日就窮蹙竭力自護冀緩須臾之死勢所
必然亦斷不能久拒而我官兵乘勝深入掃穴擒渠
無難立待又稱河西沙爾尼一帶碉寨若明亮處移
往礮位自上下轟並令五岱在赤布寨以前趕掣木
柵運大礮隔河夾擊賊必不能存站此計甚善朕前
此展閱阿桂進到地圖曾指沿河一帶似可進兵隨
傳諭商酌辦理今阿桂于未奉朕旨以前所籌適與
朕意相合自可望其有成又據明亮等奏攻克額爾

替碉寨現擬于平坡之下趕立木柵辦理亦好明亮
所稱平坡之下似即沙爾尼一帶若能如阿桂所籌
隔河夾攻自為得力明亮等即妥速為之

丙申阿桂豐昇額海蘭察額森特奏言本月初三
日酉刻於陰曠之中派撥官兵從第七峯前進之
柵令烏什哈達等趕辦從山腿直逼第八峯之柵
令福康安等趕辦是處為賊人緊要咽喉守禦至
為嚴密一見官兵運木挈柵即前來衝突官兵俟

其將近合力放鎗繼以弓箭賊勢披靡奔潰官兵
追趕攪殺而烏什哈達處又從旁下壓合勢夾擊
賊人被殲甚多官兵遂挈起木柵九座直抵第八
峯之下而烏什哈達處亦挈起五座與第八峯下
木柵相連距賊人碉卡不過半箭之地賊雖居高
臨下不敢露身放鎗僅將石塊飛擲其勢殊為艱
窘特以連日大雨泥滑頗難動手臣查此處山梁
一破瞬息即抵勒烏圍而一破勒烏圍即噶拉依

亦難固守是以臣等現又在巴占下賊人木城對面逼近擊起木柵兩座運礮轟摧以期搶佔得此則巴占之勢既孤攻奪自更稍易

同日明亮舒常奏言據駐守吉地副都統永平等稟稱革布什咱丹東二道橋盤獲賊首遣赴西藏之喇嘛達固拉僧格一名並現在金川跟隨革布什咱舊土婦之散番雅滿三朱布那瑪太二名又向達固拉僧格搜出逆首所寄班禪達賴迪穆各

喇嘛番字三封及達賴喇嘛先年給小金川印信
執照一紙又向雅滿三朱布搜出革布什咱舊土
婦扎什納木呈投吉地各官番字二封並給章谷
土司汪扎爾策登番字一封又金二十四兩五錢
銀三百七十兩七錢臣等隔別提究據達固拉僧
格供稱索諾木等屢次所具稟帖將軍們總不見
回覆想西藏活佛可在

大皇帝前代為討饒故寫三封書信派我前去懇求又

雅滿三朱布供稱土婦扎什納木雖被索諾木逼
勒成親心甚不願現有投吉地大人兩封稟帖等
語臣等思扎什納木失身于索諾木以圖苟活不
過設此一稟為將來自全地步無足深求惟逆酋
現當計窮力竭復敢遣人私赴西藏自求解免實
為可恨所有蟒袍驪頭分賞草布什咱執事土舍
頭人其銀兩查有丹東小頭人及守橋通事首先
盤獲各賞銀五兩並同拏漢兵六名各賞銀十兩

均奏八

上諭軍機大臣曰阿柱等奏稱現挈木柵九座距賊碉
不過半箭之地並稱在巴占下手賊人木城對面逼
近挈柵兩座運礮轟摧官兵攻逼漸近自可迅速得
手乃因大雨阻滯未能即克又奏到盤獲逆酋遣赴
西藏之喇嘛等犯在事番目等甚屬可嘉明亮等分
別給賞所辦甚是自應如此獎勵因思賊酋既從此
路遣人赴藏或于我師攻勒噶拉依時逆酋窮蹙無

計竟親身由此投藏求生亦未可定著諭永平李本
加意嚴防毋使免脫

甲辰阿桂豐昇額海蘭察額森特奏言查自第八
九峯而下山腿賊俱刨挖深溝以阻我兵進攻之
路且又碉寨卡柵互相應援鎗礮滾石極為緊密
今若將巴占山腿各碉柵分兵十餘隊同時齊上
攻撲只須攻開數處乘其慌亂不難全行搶佔而
繞越第八九峯後竟搗賊巢勒烏圍亦必剋日克

獲但連日大雨傾盆俟得快情即可合力攻開以
期速搗賊巢再近據投出番人稱賊目等因口糧
無出要商量偷放夾壩臣當派官兵每夜輪班設
伏以備截殺至十四日子刻有賊一百餘直撲糧
臺旁貿易民人窩舖我兵邀截內外夾擊殺賊十
數名餘多負傷而逃奏入

上諭軍機大臣曰阿桂等奏所攻巴占碉寨距賊寨不
遠俟一兩日快晴分兵同時攻撲即可繞越第八九

峯後徑搃賊巢所辦甚好佇盼捷音

同日阿桂豐昇額又奏言西路大兵直逼賊巢不論從山上山下進攻均距勒烏圍不遠但此地之河與山巖下之溪澗無異故自噶朗噶赤布寨冷角寺而至勒烏圍反係陡崖一綫之路其冷角寺以北山腿名巴克圖仰木賊人於半山攢設木城以為拒守衝壓之計而對岸沙爾尼之賊又可用礮隔河合擊我兵難以沿河直進就現在情形而

論巴占一經得手最為直捷臣等於八九峯迤下
悉力籌辦者以此奏入報

聞

乙巳明亮舒常奏言臣等察看賊人寨落高下散

布聲勢聯絡非分兵數道並攻則一路叢林密箐
賊人皆可潛伏抄截因于十五日黎明抽撤滿漢
屯土各官兵派令奎林和隆武珠爾格德阿爾都
阿蘭保等分隊督軍前進詎久雨之後泥濘異常

官兵不能用力奮撲相持至辰巳之間隨即撤回
賊于林箐中攢聚二三百衆突出尾追我兵俟其
將近回身掩擊鎗箭並發殺賊二十餘人其餘盡
皆竄散即將預砍木植在坡下趕立木柵一座派
兵拒守查基木斯丹當噶兩分山腿一名石真噶
賊人將現有番民皆聚於沿邊一帶碉寨為死守
之計其在石真噶者較少現擬乘虛以圖倘可從
此得手則沿河而南截出平坡之外于進取更為

便捷奏八

上諭軍機大臣曰賊人此時守拒益堅不過因距巢甚近自護其死無足為異現在各處敗回之賊退聚一處又無舊積之糧口食自形其絀勢必不能經久今明亮等奏擬從石真噶山腿乘虛進擊亦是一策至軍營因雨稍阻亦無足慮六月本大雨時行之候向來苗地情形秋令雨水較少明日已入新秋天氣高爽晴霽必多自可剋期奏績將軍等毋負朕懸望

七月丙午阿桂富勒渾鄂寶劉秉恬奏言_臣等將
各站人夫輓運情形公同籌議查鄂寶所奏請裁
北路各站固不無節省但從前西路軍糧以楸砥
為正路而別思滿一路佐之北路以卓克采為正
路而令南路協運供支今西路之別思滿久經停
運而北路又將卓克采運道停止悉歸併於楸砥
大板昭一路設遇山水陡發大雨時行難保無誤
若從卓克采大板昭兩路運供即有一路阻碍一

路仍可過行無滯所有富勒渾劉秉恬請留卓克
采等十三站由腊覺溝孟拜拉匯入西路轉輸之
處自應如此籌辦再現擬將南路之糧按月運供
七千石自別思滿至卓克采共十三站又自卓克
采至西路添設腊覺溝孟拜拉兩站此十五站半
每站安夫四百名即數輓運所餘二百名應行裁
去計節省夫三千名其西路各站前臣鄂寶奏請
每站添長夫六百名查自色木多至凱歌坪共六

站半倘舊設長夫臨時有不敷之處各站員雇募
客夫蠻夫自可通融應用所有應添設長夫三千
九百名宜一併裁撤惟密拉噶拉木一站既分運
勒赤爾前敵及遜克爾宗且為北站糧運總滙需
夫甚多其議添之六百名仍應安設至臣鄂寶前
議於得式梯茹寨薩克薩谷分設三站但目下情
形不同應酌裁半站又可省夫三百名臣阿桂查
鄂寶原奏計撤北路各站可節省夫五千四百名

但此內木池覺木交泥時岡宜喜得楞五站共有
人夫三千名既因打箭爐有運濟木池之米未能
停撤則所撤不過二千四百名今臣通盤籌畫雖
仍留卓克采等十五站俾兩路接濟而所裁各站
之夫實七千二百名於帑項更多節省且內地辦
夫亦不至於拮据

同日阿桂富勒渾鄂寶劉秉恬又奏言准文綬來
札擬將資哩存糧儘數運往軍營以濟急需伏思

資哩現存糧二萬餘石原因大兵一克噶拉依應
將運道移駐美諾于資哩一帶運供為便而勝兵
凱旋雖分途行走究係經由中路者居多至撤兵
以後尚有駐防兵食亦應於資哩美諾積貯分供
不宜輕動查打箭爐現存米三萬九千餘石臣等
咨明文綬每月運出七千石協供北路則脚費無
多而兵食自屬寬餘均奏入

上從之

庚戌阿桂豐昇額海蘭察額森特奏言查自十四
日至十七日連日晴霽_臣等議派普爾普官達色
為一隊瑚尼爾圖仁和為一隊攻巴占以上木城
石碕二座以斷八九峯碕卡內賊番應援之勢至
巴占本有兩座寨落又派福康安等攻上一寨泰
斐英阿等攻下一寨那木扎彰靄等分攻巴占以
下木城二座烏什哈達等攻撲第八峯碕卡_臣海
蘭察額森特等為各路接應于十八日丑刻官兵

突然前進正欲踰越大溝而溝內藏匿賊番及各
碉寨卡柵之賊競起放鎗抵禦其八九峯頂最高
賊碉亦點礮轟擊擲石如雨官兵不能踰溝進撲
乘天色未明將兵撤於木柵左近使賊探望不見
至午刻奮迅直前已有將木植板片墊過濠溝直
抵碉柵下者而山梁後有賊一二百名前來散入
各碉柵合力死拒急切不能攻取當將官兵酌撤
查巴占一帶本為賊境咽喉又勒烏圍係賊根本

之地而勒烏圍並無可守故堅守此一道山梁以
為捨死護巢之計但賊境口糧缺乏上下離心番
人投出日多其所稱賊目等互相疑貳及番人餓
死情形實已衆供如一此時賊酋等雖悉力負嵎
其勢斷不能久因思向來官兵攻打之後或稍為
歇息再隔一二日進攻今臣等現派官兵於明日
五更奮攻出其不意以期必克奏入

上諭軍機大臣曰巴占一道山梁實係勒烏圍緊要門

戶賊人於此捨死護巢或恐猝難得手前此阿桂曾
奏若從沿河直上攻佔亦屬可辦但河西沙爾尼一
帶碉寨明亮處尚未掃除若攻得沙爾尼即可於河
東攻搶巴克圖仰木半山碉卡亦能截出第八九峯
之後直壓賊巢等語似亦係進攻捷徑何以尚未見
如此辦理想因明亮未能攻至河沿之故今阿桂一
路屢攻巴占未克若不另辦分勦徒致耽延時日阿
桂此時若已攻克巴占則勒烏圍可席捲而得自屬

甚善否則派兵數千令海蘭察豐昇額帶領往助明
亮將沙爾尼一帶碉卡盡行攻克亦可合阿桂沿河
進搃賊巢之計較為便捷著即速妥酌而行

壬子富勒渾劉秉恬奏言查西路軍營現存米一
萬二千餘石已屬充裕後路自撒拉至達爾扎克
等站又共存米三萬五千餘石源源運供目下足
資接濟惟北路軍糧雖經將軍阿桂將打箭爐存
米仍由木池一路協供但恐一時未能迅速運到

臣等詢知該處每日約需米三百石當即面飭西路總理道白瀛並密拉噶拉木糧員無論北路西路之米每日務須發足三百餘石轉運北路以資支放俟木池一帶糧運暢行隨時酌量增減奏入報

聞

丁巳阿桂豐昇額海蘭察額森特奏言查自遜克爾宗舍圖枉卡而西南雖山勢延長不無多費兵

力而可進取之路頗多若派兵從舍圖枉卡直搶
菑則大海迤西南高峯即順梁由昆色爾喇嘛寺
直佔章噶山頭則菑則大海拉枯喇嘛寺均已攔
截其內賊自不能踞守屆時或從章噶順山腿下
至河邊或涉水而西皆可繞出勒烏圍之南以斷
噶拉依往來之路而從拉枯喇嘛寺山下又可繞
至榮噶爾博第九峯之後托古魯地方以斷巴占
賊人後路其由章噶而東南可攻搶科思果木勒

烏溝雖稍覺紆遠似成功反速現在大營前敵一
帶以及遜克爾宗各營卡儘數抽撤可得兵五千
以供繞進之用而巴占各碉寨現又另行相度機
宜同時竭力攻打官兵一至章噶則賊境要隘到
處可通賊必撤回醜類分頭防堵禦備多而勢力
分巴占一帶不難力取現已抽撥官兵臣海蘭察
於初一日統領先行臣豐昇額亦前往督率策應
約計初三四日即可奮力前進

同日阿桂、豐昇額又奏言前仰蒙

訓示，令富勒渾購備馬匹，解赴軍營，以資追捕賊首之

用。臣等看得番地山勢巉巖，並無牧廠。現今大臣

侍衛官員自備乘騎之馬多者不過二三匹，少者

一二匹，割草飼喂，皆須於各處搜尋，若分給滿兵

則每兵二人合用，跟役一人自樵汲炊爨，而外更

難兼顧。況此間所產之草非比蒙古地方，不能不

兼飼米豆。若照塘馬之例，以日支銀四分，米四升

計算每馬日需銀八錢有餘去年此項馬匹解赴西路時臣等酌於滿洲索倫額魯特官兵內擇其勇銳出力者每人分與一匹作為賞給並未令其支領銀米查自分賞馬匹以來經歷冬春雪厚草枯倒斃疲瘦現在所剩無幾臣等悉心籌議自將軍叅贊領隊大臣而下以至侍衛章京鎮將備弁各人所得口糧稍多皆有自備之馬約計追擒賊首賊日時可得壯健馬二百餘匹無虞臨時拮据

均奏入

上諭軍機大臣曰阿桂奏現于舊則大海山梁之西探
有昆色爾及章噶兩處若能直佔其地可繞出勒烏
圍之南以斷噶拉依往來之路所籌甚好海蘭察已
統兵前往進勦自可迅望得手又據奏軍營馬匹自
將軍叅贊領隊大臣而下各有自備之馬約計追擒
賊首賊目時可得二百餘匹無虞臨時拮据所辦甚
是明亮處昨歲即經阿桂知會自必遵照辦理舒常

一路亦然至富德南路情形大畧相仿自應照阿桂處章程一體妥辦阿桂籌辦軍營大小諸務實為盡心今時當盛夏統衆攻堅賢勞足念因御製詩六韻親書箴頭賜之以示嘉獎

平定兩金川方略卷一百二十

欽定四庫全書

平定兩金川方略卷一百二十一

七月己未明亮舒常奏言查石真噶為保護沙爾
尼要口礮卡嚴密近經大礮連日轟摧賊料官兵
必從此前進更添集多人趕築石城以圖固守臣
等再四審度舍此一路別無可進機宜而官兵每
當前進少有聲息賊即鎗石如雨實難施展兵威
因思向來人夫運礮合力共作喧聲嘈雜賊人習

以為常不加防備適新鑄大礮已成遂於二十八日飭令連夜運赴石真噶隨派奎林和隆武等乘運礮聲囂之際分隊前進比及賊人知覺周圍施放排鎗而官兵一擁直入將迎面大礮石卡石城全行佔據賊勢紛紛四散並將正中大礮併力搶奪共殺賊四十餘人其餘中鎗著箭跌斃崖礮者甚多現將新克礮卡石城平房俱行拆毀即於其地趕立木柵三座派兵守禦查石真噶一山從基

木斯丹當噶分支東下其中突起石包為賊所必
爭之地今被我兵佔據其下截山腿雖賊稠聯絡
並向南斜坡為噶西喇嘛寺俱有賊番攢聚然已
不憂下壓之難是沙爾尼一帶賊已無險可恃奏

入

上諭軍機大臣曰明亮等自攻噶爾替以來久未能進
甚為厯念今乘運礮人聲喧雜之時派兵分路前進
奮勇直入連佔大碉追殲賊衆自足令賊人喪膽且

官軍連據石真噶石色其下山腿碉卡無難攻壓而得即沙爾尼一帶之賊亦俱可趁勢掃除其距勒烏圍雖隔一河而為地甚近自可即與阿桂等合力奮勦看來賊勢日益窮蹙今降番男婦各路紛紛投出賊中乏食慌亂情形大概可知唯在各路將軍等設法上緊妥辦迅奏膚功共膺茂賞

壬戌阿桂豐昇額海蘭察額森特奏言巴占一帶山梁賊人捨死抵禦實已不遺餘力今從舍圍枉

卡分路進攻賊酋若撤為返顧之計巴占既不難
攻克而官兵於巴占一帶不分晝夜連日攻打以
掣其全力則舍圖枉卡一路進取自易為功所有
從舍圖枉卡進攻之兵臣等酌令普爾普秦斐英
阿等攻取章噶山東臣海蘭察帶兵策應並攻與
章噶相近之果克多山碉又令瑚尼爾圖攻與果
克多相近山碉其昆色爾喇嘛寺東接雅木則西
接章噶且在拉枯喇嘛寺之上形勢最為扼要因

派令額爾特等帶兵攻打其苗則大海各碉令常祿保等攻打至舍圖枉卡右手溝內有巖洞在箐林中賊藏匿於此令章京巴彥泰等帶兵截殺不使來擾我兵前進之路又巖洞下寨落五處均有賊據守復令富興成德海祿等分頭攻搶均定於初三日一早進攻但從舍圖枉卡分進之兵雖均係潛密夜行賊人無從望見亦必先於巴占攻搶使賊不能分力往援初三日丑刻度是時舍圖枉

卡一路官兵已經前進復派將領等分路進攻巴
占寨及八九峯上各碉卡官兵突然搶上直過濠
溝賊番施放鎗礮擲石如雨官兵未能得手暫為
撤下其舍圖枉卡進攻之兵泰斐英阿額爾特等
進至拉枯寺之上各處賊衆復來迎拒額爾特一
面酌留官兵衝壓一面直上昆色爾山梁進攻昆
色爾喇嘛寺燈附登碉儘力攪殺其逸出賊人又
被官兵痛殲遂將昆色爾寺奪據維時官達色等

帶兵循梁東上直佔至雅木則碯對面臣海蘭察
即將果克多山峯戰碯攻克而瑚尼爾圖所攻之
碯寨及富興成德海祿等圍攻各寨落亦全行攻
克惟拉枯喇嘛寺賊人尚在死拒初四日寅刻即
派官達色泰斐英阿額爾特等先將附近各寨克
獲縱火焚燒旋進圍喇嘛寺官兵飛騰而入賊人
逃遁無門亦均誅斃遂將喇嘛科爾三寨所屬之
卦爾沙巴等寨悉行掃蕩其昆色爾寺等山陽什

爾德擦烏曲所屬之格思等寨焚燒過半至常祿保等所攻之苗則大海各碉賊已挖有深濠排列松籤鹿角備禦甚嚴常祿保等一面力攻一面令官兵繞出其後將大戰碉圍裏攻克其餘山梁各碉卡亦經逐一掃除所餘雅木則一碉又經官達色與常祿保前後合攻乘勢攻獲統計攻燒碉寨一百三十餘處殺賊二百餘人搶獲銅礮一尊手礮二尊其餘刀矛鳥鎗等物無算查舍圖枉卡一

路官兵竭三日三夜之力佔據地方縱橫三四十里雖章噶一處尚有賊人負嵎然可以繞截之路已經踰定章噶一經克獲即可截出勒烏圍以南路徑頗多賊酋左夫右詘自當立成瓦解入奏

上諭內閣曰阿桂等奏從舍圖枉卡繞截圍攻將昆色爾山梁奪據並將果克多山峯戰碉攻克旋進克拉枯喇嘛寺及舊則大海各碉此次官兵等繞道奮攻奪碉殲賊實屬勇銳可嘉所有將軍參贊等統俟攻

克勒烏圍時一併從優議叙其打仗出力之將領弁
兵等著阿桂查明咨部議叙

上諭軍機大臣曰此次攻克舊則大海昆色爾各山峯
礮卡並拉枯喇嘛寺額爾特出力尤多功罪足以相
抵著賞給三等侍衛令其益加感奮以勵後効至攻
奪礮卡將士踴躍倍常其中多有勇銳出衆之人著
阿桂查明如係未得巴圖魯號者即奏請賞給其已
得者奏明量加賞賚俾將士倍知鼓舞速成大功

同日

上又諭軍機大臣曰閱進到地圖已經攻克者頗為不少若能將章噶速行攻獲即可截出勒烏圍以南固屬甚善或賊人守拒尚堅未免畧需時日閱圖內新得之魯克塔爾地方可通勒烏圍大路若從魯克塔爾山溝而出至托古魯對面過河由布勒一帶至勒烏圍可順壓而下似屬直捷今用硃筆點出著發交阿桂其悉心酌辦

臣等謹案巴占山梁為賊番要隘抵拒甚嚴我兵猝難得手臣阿桂等另籌於苗則大海之西佔據章噶山頂繞出勒烏圍以南前奉

諭旨令攻取巴克圖仰木截出第八九峯之後茲復按圖

指示由托古魯過河順壓而下較為直捷西路官兵果從舍圖枉卡一路進克章噶即下溝渡河斜上托古魯山梁並由巴克圖仰木兩面合攻直壓

賊巢是萬里外山川形勢進取機宜早在

神機洞照之中在事諸臣仰蒙

福庇動必有成實深欣抃也

癸亥明亮舒常奏言石真噶為賊所必爭之地臣等現已佔據形勝攻之自不可緩適接阿桂來扎約定初三日同時進攻隨酌分兩路派奎林烏爾圖納遜攻取向南之噶西喇嘛寺而以富寧阿爾薩朗等為左右翼和隆武珠爾格德攻取迎面石

城而以德赫布阿爾都等為左右翼與兆舒景安
帶兵接應是日將及黎明臣等督率前進和隆武
帶兵至橫溝已預備長板搭架無不一擁而過將
近石城賊四面放鎗滾石我兵不為少沮將石城
兩礮悉行搶奪即合兵乘勝長驅賊人紛紛敗竄
所有接連之兩戰礮兩石城均即以次攻克并得
木城一座惟第二木城小起石包復有深溝橫截
賊於溝內向上放鎗迎擊不絕我兵難以超越和

隆武一面相持另分兵兩隊從山下左右兩旁截
出賊後圍裹木城立殺賊二十餘人并生擒一人
餘即奔潰至奎林一路噶西喇嘛寺之前尚有寨
落兩處官兵向前攻克殲斃十餘賊餘俱竄入寺
內抵拒我兵四面攻撲其寺側樹林內伏有暗溝
一道賊即由此逃遁隨令兩路官兵各在所佔之
地趕拏木城駐守

同日明亮舒常又奏言本月初二日金川頭人阿

布僧格太並伊妻薩納木錯投到石真噶前敵經
官兵押赴大營據供係如寨大頭人管理四寨地
方因官兵打破如寨聞得我所管之霍爾甲阿咱
拉投到大營俱已重用今又失去石真噶衆人愈
加慌亂原想約齊本寨同出恐人多走漏消息不
如及早投降等語臣等即面諭阿布僧格太令其
跟隨綽斯甲布頭人同赴周叟官寨將伊家眷安
插再來軍營効力隨據稱願令家屬自往周叟我

存營打仗臣因察其懇請再三出自誠心因即於
初三日打仗令其同綽斯甲布土兵引路前進阿
布僧格太不獨勇往直前及攻克賊地後且高聲
向賊卡喊叫說我投順

天朝受將軍大人重賞今日帶兵前來爾等不知道理
代土司拒守將來必要取死其時卡中賊衆俱不
能答應臣等現將伊家屬安插周叟并諭雍中吐
爾結妥為照管留阿布僧格太在營察看嗣後出

力光景隨時酌用均奏入

上諭軍機大臣曰明亮奏由石真噶分路下壓連克碉
卡木城並攻獲噶西喇嘛寺將士等踴躍直前均屬
可嘉而和隆武尤為超衆國家又得一出力好大臣
為之喜慰明亮等現在乘勝下壓自可迅勦沙爾尼
一帶進搗賊巢佇盼捷音又據奏金川頭人阿布僧
格太攜眷來降隨營打仗實出至誠其所屬之霍爾
甲阿咱拉俱經賞給藍翎此人竟應賞給二等待衛

以示嘉獎俾其益生感奮番人男婦各路投出者紛
紛而頭人來降則自此人始今加恩受職並賞花翎
賊衆聞知或應相率來降未始不可以此為招徠之
計前此傳諭以頭人如有來降者俱當解京治罪原
指大頭人如丹巴沃咱爾等黨助惡逆者而言若如
阿布僧格太輩果能竭誠投降原可恕其已往若再
能出力並當逾格施恩且不獨此時為然即攻克勒
烏圍以後有頭人望風來降者尚可一體收用若大

兵已抵噶拉依賊衆窘迫之時始出投降則非此時
可比只應暫留營中解京辦理

乙丑富德奏言臣等探察賊衆情形稍有間隙即
設法攻取查此時河水漸涸沿河顯露石灘若出
其不意暗剗地道直抵噶咱普用火藥轟陷賊碉
乘機搶據要隘進取馬爾邦更為得力臣等一面
派兵牽綴賊勢一面令舒亮留保住佛喜挑選兵
丁密行挖掘現在十分中已得其半約計旬日之

間即可告竣奏入報

聞

丁卯阿桂豐昇額海蘭察額森特奏言拉枯喇嘛
寺之下溝底斗里一寨有賊拒守成德帶兵自上
壓下即行攻克至攻勦章噶之兵派普爾普泰斐
英阿從章噶山梁左邊統截薩爾吉岱額爾特進
攻相連之達瑪噶朗一碉瑚尼爾圖等分攻其下
各碉卡其章噶一碉令官達色仁和海祿等帶兵

左右分攻臣海蘭察攻其正面臣豐昇額親往督
率初八日寅刻分隊前進賊番於章噶碉座之外
已挖有深溝三道將樹枝亂草平鋪溝上蓋以薄
土溝沿既挖有鎗眼其外又樹木柵以為抵禦官
兵一至溝前砍斷木柵即已覺其狡計隨拔去所
砍木柵橫搭溝上乘之以過賊人鎗石交加且碉
座高堅力攻良久緣碉角蟻附而上直至碉頂層
層砍殺而下賊人驚惶竄出官兵合圍力勦殺賊

數十人將章噶大碉克取并搶得碉旁木城其時
普爾普等搶上舍爾都拉以後山梁四面攻打而
瑚尼爾圖薩爾吉岱等又分道擁上山梁賊見我
兵勢猛力不能久一面拒敵一面竄逃官兵衝躡
其後鎗箭齊發賊人傷斃甚多並掣獲男婦七名
將兩山峯俱行佔據乘勝克獲寨落二十餘處旋
於初八九兩日將章噶上下十餘寨一併焚燒勦
殺此次所得地面甚寬接續不易因又將額森特

隊內之兵撥往千餘並將附近後路營卡之兵竭力抽撤以供前進之用

同日阿桂豐昇額又奏言臣等於初七日攻克章噶等處碉卡即有什爾德山上額洛木寨頭人革

什甲木叅並寨首僧格爾結等帶領番人二十戶

投至官兵卡上又有喇嘛科爾頭人雍中帶領番

人二十戶於初八日投出至初九日又有什爾德

寨頭人丹比西拉布領番人二十一戶投出統計

六十一戶男婦大小二百二十口經臣等面詢均稱金川地方百姓乏食者居多而伊等口糧尚不至乏絕且什爾德一帶莊稼將次黃熟亦可即資口食惟見西路官兵分頭攻進即日掃平又屢蒙將軍大人諭令及早投降皆可免死是以先行投出臣等察其言語尚非愚昧番民可比必實見金川滅亡萬不能再延時日始為此接踵來降之舉而此四五日內其零星投出者又五十名口向未

有全寨數十戶連日陸續來投者是賊酋滅亡在
即更無可疑即將該番等發往附近內地土司安
插仍令密為防範其尚可得用而又帶有眷屬之
人則將家口安移向內而留該番在營隨同打仗
並令其隨機招撫則金川蕩平之局自必更為迅
捷均奏入

上諭軍機大臣曰此時章噶既得已拊勒烏圍之背或
先斷截勒烏圍通噶拉依之路或自上下壓直搗勒

烏圍均可計日而得設或賊衆自揣力不能支逃回
噶拉依即未能多殲賊衆而業已掃其一穴自益見
窘蹙看來賊衆即或聚守一隅而敗回之賊愈多口
食愈形竭蹶其勢斷難久拒但恐賊人外竄未免又
羈時日不可不多方設法廣為攔截又據奏頭人等
率領戶衆來降其慌亂情形大槩可見自是極好機
會至該頭人三名誠心納款尚非窘急求免情較可
原如認真出力應賞給藍翎頂帶俾倍加感奮報効

効且使番衆聞知益堅其投出之心賊勢更易於潰
散阿桂等即當妥酌而行

同日顏希深奏言兩路軍營屢經克捷指日可抵
勒烏圍現在北路軍營所貯米麵可敷目前之用
若存貯過多恐一時移營反致累墜且往返滾運
所費不貲臣已飭附近之茹寨薩克薩谷兩站各
設倉房十餘間截存米三四千石以備移營時就
近運供若大營需用亦可朝發夕至奏入報

聞

己巳明亮舒常奏言本月初三日將石真噶下節
山腿攻克僅餘木城二座未及立時搶佔查二木
城之下坡礮層層樹枝交錯地方極為寬廣中間
界以橫溝由巴舍什甲索諸山之下彙流入河溝
南則為丹扎木溝北則為達思拉木而沙爾尼又
係此一帶之總名賊寨星羅密布四面縱橫若非
分兵數隊到處合圍賊必彼此救援轉致受敵臣

等隨派奎林阿爾薩朗等由中路之右進攻和隆
武德赫布等由中路之左進攻另派珠爾格德等
在奎林之右為一路圖欽保等在和隆武之左又為
一路於初九日臣等督率並進奎林和隆武一面
派令都司沙津岱將前後兩座木城帶兵圍裏伊
等即帶兵繞過木城將山下第一處寨落併力攻
奪立時燒燬而木城各賊番隨即潰圍四竄官兵
踴躍當先分頭采入賊雖放鎗擲石四處拒守而

我兵所向披靡共克一十七處寨落惟向西一寨有頭人絨布僧格在內堅守不下當令日前投到之頭人阿布僧格太前往誘降絨布僧格始率衆番六名投出又沿河砌下一寨有頭人策旺據守經章京孟德見策旺據立碉頂即密放一鎗擊仆而其內賊人尚未解散因令阿布僧格太復往招諭尚餘賊番一十五名將策旺扶出碉外請降計攻克溝北達思拉木寨落已有十分之七除殲斃

賊番外割獻首級四十餘顆內有頭人納拉薩納
木一名生擒賊番三十三名並據教成稟報稱是早
與副將常泰分為兩路進攻碾占其頭碉內僅存
賊一十餘名正當迎面放鎗而遊擊銜馬應詔守
備孟洪翼另帶土兵從碉後抄截賊人棄碉逃遁
被我兵鎗斃二名復前攻第二碉我兵將至半山
插石如雨不能上撲而所克頭碉拒賊甚近難以
照應隨即拆燬至午後撤兵臣等現擬將溝址達

思拉木一角速行勦洗越溝而南其丹札木所有寨落亦無難以次掃蕩但得轉出扎烏古山腿之前則與勒烏圍對面只隔一河臨期夾攻可期旦晚必克奏入

上諭軍機大臣曰明亮等奏由石真噶下壓攻克沙爾尼溝達思拉木一帶碉卡所辦甚好至新降頭人阿布僧格太此次招降頭人絨布僧格並策旺寨內衆番頗屬誠心効力著明亮酌賞緞疋傳旨嘉獎以示

鼓勵又章京孟德用鎗擊仆策旺甚屬得用又奎林等派令圍裹木城之都司沙津岱及教成進攻碾占時帶兵從礮後抄襲進勦賊番之遊擊銜馬應詔守備孟洪翼均各奮勉並著明亮確查各該員等此次勞績及平日勇幹勤勉若何奏明請旨

庚午阿桂豐昇額海蘭察額森特奏言大兵既克章噶若渡溝而南搶上科布曲山梁固可出勒烏圍之左但現已深入三四十里所有之兵不敷接

續卽上至山梁而該處碉卡如林恐未能立即掃
除臣阿桂思自巴占左手而下巴克圖仰木一處
臣從前原擬於此分攻因賊已於半山攢設木城
拒守衝壓而對河沙爾尼之賊又可隔河用礮以
撓我兵故臣等前奏欲俟明亮處攻得沙爾尼再
行攻搶若從此上攻而臣海蘭察又從托古魯寺
處直上兩軍合會不但巴占及八九峯碉寨木城
均攔截於內而下壓勒烏圍巢穴亦勢等建瓴現

在分路進攻揆度賊人再不能別處滋擾遂于臣
阿桂大營及後路內又抽兵三千分為四隊從巴
克圖仰木及榮噶爾博八九峯並巴占寨上下分
攻其托古魯進攻之兵亦分兵四路由章噶下溝
進搶山梁各碉卡臣額森特進攻之巴木圖至直
古腦山頂木柵層層聯絡備禦堅固卡座更多十
二日子刻官兵從鎗石叢中奮勇衝上福康安烏
什哈達等將兵分隊攻搶共得大小木城碉卡寨

落五十餘處上據山梁而五岱五福明仁等亦即
將薩木卡爾山腿各碉卡克取與臣額森特之兵
會合至臣海蘭察之兵是日丑刻踰溝直上賊人
已於林箐中間及山梁之上放鎗力拒官兵一面
攻擊而侍衛泰斐英阿等一面分兵潛從山梁陡
險之處攀援而上將碉卡全行克獲保寧官達色
仁和等亦將溝底寨落七座奪取與臣海蘭察之
兵會合所有八九峯及巴占一帶碉寨均已圍截

在內攻至抵暮臣料賊必乘夜潛逃先派兵于溝
底箐中設伏即督催力攻官兵四面合呼一齊撲
上其巴占一帶之木城石礮經富興書麟等攻克
第八九峯及巴占穆古一帶礮卡經特成額劉國
樑等攻克此數處竄出賊人除被官兵追趕截殺
外餘多跳崖身死其時特成額于攻克各山峯後
酌量留兵駐守即帶兵從山梁趕下至臣額森特
處合兵遂于十三日子刻臣額森特率同福康安

烏什哈達特成額等向冷角寺從高下壓賊人且拒且逃官兵追殺直至河沿將冷角寺及附近寺旁寨落搶佔焚燒已壓至勒烏圍之上是日海蘭察額森特等乘勝直搶勒烏圍賊巢分兵圍其兩面臣等熟察情形勒烏圍官寨西臨大河其南則寨落相接一里有餘直至轉經樓再南即甲爾曰磔橋賊人現俱據守但遙見河中皮船往來絡繹不絕恐賊人從此竄逸更當迅為籌辦查河西明

亮一路官兵尚未至賊巢對面河中水路一時不能遽斷若從托古魯左手向南抄截而下得佔據轉經樓亦可斷其沿河來往之路臣等於十三日派兵前往攻打而轉經樓碉寨亦甚高堅且我兵無可遮身之處遂將官寨至轉經樓中間一帶寨落焚燒十之七八此數日內共攻克大小碉卡木城一百四十餘座喇嘛寺一所寨房一千數百間殺賊二三百名生擒活口二名賊人因勒烏圍及

轉經樓碉寨高堅可恃仍思死守官兵攻轉經樓
時無所遮蔽是以稍稽得手今已趕拏木柵進逼
並運大礮力轟則轉經樓計日可得而勒烏圍自
歸掌握

同日明亮舒常奏言臣等于十二日黎明望見阿
桂一路官兵直壓勒烏圍之頂恐西岸一帶賊人
過河救援自應發兵牽綴隨派奎林和隆武等于
巳刻由西路分兩翼並進賊人將零星碉寨盡行

棄去於樹林中存有三處緊要碉寨俱竄入拒守
經左右兩路官兵復分為三隊將三處寨落先後
搶佔賊人擊斃寨內及追殺者甚多官兵搶過溝
南而丹扎木各處接應之賊俱聚集於達爾科一
山抵禦極為嚴密臣等察看情形諒此西岸賊人
必不敢捨而他顧恐相持過久不能得手轉致多
傷士卒隨令撤回臣等因溝南丹扎木一帶碉寨
排列直前有扎烏古山梁直插河流欄截去路務

須設法籌辦現在各營抽撤兵丁加緊進勦與阿桂
早會勒烏圍以期迅速歲事均奏入

上諭軍機大臣曰阿桂等奏將直古腦榮噶爾博一帶
碉寨及冷角寺等處悉行攻克已直壓勒烏圍之上
現派官兵圍其兩面勢若建翎自可唾手而得唯據
揚中爾甲木燦供稱老土婦阿倉及僧格桑之妻得
什爾章用皮船過河而去茲羅奔等隨後亦從各路
逃竄等語賊首賊婦諒不過逃回噶拉依計官軍掃

穴擒渠自斷不能漏網惜此時未能即行擒獲耳又
聞圖內甲爾日礮橋一處在勒烏圍西南通噶拉依
要路若能先將此處攻得斷賊往來之路賊衆自無
可逃阿桂現尚未能得必須設法先行攻克則勒烏
圍之賊更難自存勒之尤易為力朕於圖內用硃筆
標記發交阿桂速為籌辦同日明亮等奏現在已攻
扎烏古山梁隨將丹扎木寨落焚燒等語明亮攻得
扎烏古即可與阿桂并攻勒烏圍更為得勢佇盼捷

音



平定兩金川方畧卷一百二十一

欽定四庫全書

史部

平定兩金川方略卷一百二十三

給事中臣查善長覆勘

總校官原任侍講臣王燕緒

欽定四庫全書

平定兩金川方略卷一百二十二

八月丁丑阿桂豐昇額海蘭察額森特奏言臣等
于十五日十六日由托古魯山腿趕挈木柵而下
該處距賊寨甚近而科布曲山腿鎗礮及轉經樓
等處鴉鎗均可相及賊又伏於各寨內不時出擾
我兵迎住截殺戮戮頗多但托古魯山腿迤邐將
盡處有隆斯得寨落三座我兵不論往攻何處均

須從旁經過賊衆聚守為勒烏圍東南屏蔽若不
先為掃除難以挈柵直下殊于進攻有礙十七日
派普爾普瑚尼爾圖官達色額爾特等帶兵挈柵
並分頭攻打隆斯得寨是寨為賊人收藏鉛藥之
地守禦甚嚴自午刻攻至申刻官兵擁上礮頂斧
劈寨門將兩寨攻克殺賊三十餘名來援之賊復
潛入最後一寨合力守禦至亥刻一并攻開其竄
出者多為鎗箭所斃寨內有房一間堆貯鉛子積

地二尺至數寸不等又有火藥一百餘簍俱行收
獲當將隆斯得三寨佔據即從此接拏木柵查勒
烏圍轉經樓中間寨落前此派兵繞道焚燒雖已
燬十之七八但隆斯得寨未經克取官兵尚不能
于此佔據而賊人仍潛伏各寨以為迎拒聲援自
當搶佔此中間各寨始可拏柵前進十九二十日
夜接連發兵攻打將各寨落奪據拏柵三十餘座
礮臺七座往前進逼至福康安烏什哈達等于冷

角喇嘛寺前分攻亦用大礮自北而南合轟勒烏圍官寨並直前接拏數柵已抵官寨稍北至近高礮相去不過一箭之地飭令每夜派兵設伏礮下如賊有竄逸情形即行截殺查托古魯山腿及冷角寺兩處均已運大礮轟摧幾於每礮皆中而衝天礮亦已運來施放但官寨高大堅厚惟仗礮力逐漸轟摧不能不稍延時日自當以截斷後路為迅捷今官兵所佔之地已插在勒烏圍轉經樓中

間其礪上往來之路已斷但此下尚有路一條在
崖礪之下河灘之上而官兵欲斷此道其前復有
大礪寨一座寨之左右又聯以羣寨必須攻得此
處則其餘寨落既易掃淨且斷崖礪以下之路而
勒烏圍鑿經樓及各處賊人來往無路可通更難
死守但此寨亦極高堅現已攢礮力摧並即發兵
攻搶以期必克

同日明亮舒常奏言查賊人恃扎烏古山梁險要

於丹扎木各寨之前悉衆死守臣等體察賊情其
前寨落聯接守禦甚嚴若出其不意發兵渡河而
東取路深入再過西岸從扎烏古山下自內衝出
而以正兵在外夾攻賊必易於潰散隨于十四日
晚即齊集船隻挑選屯土勇銳兵丁四百名派令
委署章京祿慶土千總二什格帶領而以投番阿
布僧格太及霍爾甲阿咱拉等為之引導於丑刻
渡至東岸至扎烏古對面復渡而西務在聲息無

聞使賊人不覺一面即派和隆武德赫布珠爾格
德等沿河直進接應在內兵丁而以奎林統攝各
隊將領分頭努力攻取臣等在後策應於十五日
黎明一擁過溝各寨內賊人鎗石應聲而至正當
彼此相持而扎烏古放鎗甚緊正路各官兵共知
此番舉動等之破釜沈舟倘少存畏難之見則在
內一路屯土兵丁竟無一人得脫極有關係無不
奮勇直前將丹扎木所有寨落遂層攻破焚燒與

屯土兵丁兩面夾攻，教成亦於甲索進攻，牽綴賊人棄碇逃竄。為我兵前後殲殺，無算。當即合兵一處乘勝搶上扎烏古山梁，適救援之賊紛紛自上而下。我兵爭先迎殺，親見為首賊目身帶箭傷，即時敗退。現詢之投出番人，即係阿卜策妄。是日並有頭人勒富斯丹、巴普賴申、扎二名、焚斃丹、扎木寨內將至申酉之間，將丹、扎木悉行洗蕩，移營守禦。而扎烏古山梁將到臨河，復分為三腿，其第一

條山腿之上業經佔據去勒烏圍對面更近但溝南溝北沙爾尼一帶地方雖已掃除而其上克爾瑪斯底葉安及納木迪曲碩木等處皆足為後路滋擾之患必須由扎烏古向上進攻接通教成甲索一路則克爾瑪等處賊人皆攔截在內不攻自潰現將後路各要隘築碉聯絡即可省出兵數抽赴前敵為并力進攻之用均奏入

上諭軍機大臣曰阿桂等奏攻克隆斯得賊寨係賊藏

貯鉛藥之所現獲其火藥一百餘篋其鎗子堆貯屋
內自數寸至二尺餘深此必係賊人前歲在木果木
劫取者今經官兵收得實為快意此寨一得賊人鉛
藥無資自更難於守拒官兵攻勦尤當迅捷至明亮
處攻奪扎烏古山梁派委之屯土兵丁及引路之降
番阿布僧格太霍爾甲阿咱拉等甚為出力自應予
以獎勵著明亮即傳旨將阿布僧格太霍爾甲阿咱
拉三員酌賞緞疋其屯土勇銳兵丁著各賞一月錢

糧俾伊等益知鼓舞至於番地路徑土兵固所熟悉然用為嚮導則可若攻堅越險則索倫吉林兵丁皆所優為即綠營中亦有可供驅策者遇有攻打碉寨之事自應將滿漢兵丁與屯土各兵一體選派業已節次傳諭何以明亮此次進攻仍專選屯土兵四百名獨當一面並不派令索倫吉林及綠營精銳兵丁合力前往殊屬非是又明亮摺內稱正路官兵進攻倘少存畏難之見則在內屯土兵丁竟無一人得脫

等語是明亮未嘗不知此地之危險而令降番土兵
前往嘗試倘使若輩窺破必私相抱怨謂將軍不惜
伊等身命令其前驅冒險豈肯復安心出力且同係
番人其為賊死守抗拒者實堪切齒必當殲戮無遺
若既已投誠即與內地之人無異自當一視同仁至
屯土兵衆均係効力隨征尤不應稍存歧視將軍等
若專於滿漢兵丁優加體恤而於降番土練視為無
足重輕不稍顧惜如此即為不公此事甚有關係著

傳諭阿桂等一體遵辦

臣等謹案屯土各兵踴躍從征且番境熟悉軍營固為得力至於臨危薄險節力均勞尤在將兵者均平調遣茲攻奪扎烏古山梁發兵渡河而東復潛過西岸自內衝出夾攻雖亦出奇制勝但究係專用土兵獨當危險未與滿漢兵丁一體選派荷蒙

皇上諄切傳諭凡降番土練不可稍分畛域既使土兵

等感淪肌髓而於

國家用兵體制尤見至公益仰

聖主覆載之量一視同仁凡行軍授律者可以奉為法則也

庚辰桂林奏言查當噶爾拉一帶山勢延袤道路叢雜處處交通賊境而越過當噶爾拉以下即可直抵噶拉依向為賊人出入門戶臣悉心相度附近當噶爾拉之阿布爾則等處山勢高聳曠望可

以遠及前曾築砌高碉撥兵巡哨現已添派漢土官兵輪流守望一有賊來踪影即堵截掩捕其僧格宗一帶現雖未駐官兵而既設河南之榮寨達實喜瑪爾里塔克撒各處官兵俱與僧格宗等處僅隔一河如有賊人竄匿瞭若指掌且河水現已平淺無難登時渡涉前往搜擒現已密行札知哈青阿查照各要隘督率營卡官兵分頭偵探加意巡防并於各營防兵內擇勇銳七八百名密為分

布以備臨時堵截擒拏奏入

上嘉之

癸未富德奏言臣等所挖地道已抵賊人第一條
山腿離噶咱普碉卡木城尚隔十餘丈查噶咱普
接連斯第博堵有山腿四條其上碉卡密布若將
此處攻克則河北之得爾烏亦可繞截在內即於
二十四日派舒亮斐慎等在河南一路扎爾桑開
泰等在河北一路各統兵分隊均定於火藥轟擊

之後乘勢搶佔二十五日黎明點放引線噶咱普
山腿下石碉一座木城一座石卡兩座立時轟塌
烟焰瀰漫有數賊轟於半空支解而下其餘斃者
甚多官兵勇氣百倍舒亮等帶兵奮擊至第一道
山腿中間將碉卡攻克生擒賊番一名殺死二十
餘名又守備劉魁由懸崖繞攻山腿上木城同時
搶獲河北之兵亦於轟擊賊碉後經扎爾桑等衝
冒鎗石力撲賊碉殲戮甚多而碉卡溝內及各處應

援之賊放鎗滾石抵拒愈堅飭將官兵徐徐撤回

奏入

上諭內閣曰富德奏劄挖地道運貯火藥將噶咱普山
腿下礮卡木城立時轟塌斃賊甚衆富德調度有方
將弁等亦各實力奮勉均屬可嘉富德俟大功告成
一併優叙所有在事出力之將領弁兵等並著交部
查明議叙

甲申阿桂豐昇額海蘭察額森特奏言此時托古

魯山腿官兵以及冷角寺之兵兩面圍攻勒烏圍賊人以高礮下道路一條有大礮寨為之遮蔽未能遽斷連日雖攢礮合攻未見大有損坍臣等即于二十一日夜派普爾普瑚尼爾圖泰斐英阿額爾特等進攻賊從寨牆之上放鎗拋石悉力抵拒并於大礮所透孔穴內放鎗外擊我兵離寨稍遠者均用鎗箭擊射牆上之賊其逼近寨牆下者即將備帶柴捆草束以木叉挑上寨頂堆積寨旁使

賊不能從孔穴中施放鎗石而我兵又將火彈藥
囊拋置柴捆草束之中頃刻火發礮寨烟焰飛騰
賊人燒斃寨內甚多其從烟火中突出者又被斫
殺殆盡遂于其旁連夜趕掣木柵將此寨佔奪惟
是自此下至河灘尚有高礮五層每礮數尺至丈
餘不等其間亦有寨落賊先竄入據守應須逐層
攻克但該處左右與勒烏圍寨轉經樓皆鎗箭可
及若日間進攻掣柵不免傷損過多臣等每夜發

兵攻打接拏木柵十一座二十四日戌刻官兵在大風雨雹之中又拏起木柵四座礮臺一座已至第三層高礮之上二十五日夜復派普爾普帶官兵奮勇直前拏柵四座以便聯絡而下賊于二十六日子刻攢集一二百人潛至柵下扳斷木植數根我兵不及放鎗隨將刀矛斫戳出柵奮擊而別寨官兵亦俱星馳接應賊人旋即遁去又隨拏柵兩座臣等查看情形轉經樓之北尚有木城一座

二十七日夜又派兵三路進攻其轉經樓相近木城雖被大礮轟摧已見塌損但地居高阜賊人四面剏就深濠排豎鹿角備禦極為堅固臣等一面令官兵牽綴一面乘昏黑中派兵挖溝前進一至礮下突然而起賊在寨外礮下埋伏者多被我兵殲戮而寨內之賊死拒不出屢拋火彈急切未能即然且該處距賊寨更近賊人鎗礮不絕因佔據其旁一寨接挈木柵兩座已經下至第四層礮下

與賊寨相隔只有三丈現復移礮于礮下柵內從旁轟擊此寨一經得手不但勒烏圍可以即得而賊已幾無逃竄之路奏入

上諭軍機大臣曰賊衆當此窘迫之時尚敢捨死抗拒實為可惡然亦不過護巢情急暫緩須臾官軍奮力圍攻蟻輩豈能經久况我兵接挈木柵已至第四層礮下用礮轟摧尤為得力自可剋期而待

八月丙戌明亮奏言查扎烏古之北另有小山梁

一道名為琅谷其下即係納木迪官寨如得此山
梁納木迪已在掌握此處西南一角悉行洗蕩則
自基木斯丹當噶至甲索一帶後路已俱肅清沿
途所設守卡兵丁自可酌量抽撤以資打仗現在
挑派滿漢屯土官兵於一兩日內即當進勦先將
扎烏古努力攻取不惟甲索一路可以指日接通
即扎烏古第二第三山腿亦無難迅即掃除直出
勒烏圍對岸

同日明亮又奏言前奉

上諭派令舒常帶兵前赴吉地駐紮業於二十六日起程但念現當乘勝長驅正資土兵出力舒常在綽斯甲布日久與臣鼓勵各番及商辦一切均得駕輕就熟之益一旦調赴他處而軍營事務紛煩非臣一人所能照料無誤必得另請叅贊又恐驟易生手可否俟舒常至吉地將防守事宜查辦另委大員前往更替回營抑或仰懇

皇上另派參贊之處恭請

訓示均奏入

上諭軍機大臣曰明亮奏設法從琅谷一路進兵果能如此辦理則後路尤覺肅清於攻取自更有益又據奏舒常在綽斯甲布日久得駕輕就熟之益或另委大員更替回營或懇另派參贊等語現在大功指日告成自不值另派參贊前往且更易生手亦未必悉合機宜是北路軍營應令舒常仍回參贊為妥但吉

地防守匪逆外逸之事亦甚緊要必得可恃之人獨當一面方妥因思桂林熟悉番地情形遇事亦能籌度其所駐之章谷現無必需應辦之事該處又與吉地相近且前據稱尚有兵七八百名莫若即令桂林於此內選兵三四百名迅速帶往吉地駐守其章谷僧格宗一帶地方即交哈青阿同李世傑照桂林所辦章程妥協經理舒常於桂林到彼時將一切要領面為講究交辦仍即回北路軍營與明亮迅速商同

進勦

同日鄂寶顏希深奏言查基木斯丹當噶舊營去新營一站北路糧運即可由茹寨沿河直抵新營所有薩克薩谷一站應請裁撤再基木斯丹當噶一站本係隨營支放今大營移駐沙壩北路之米雖不由該站接運而南路協濟之米必由此轉輸應請自基木斯丹當噶至沙爾尼新營作為一站所需人夫即將裁撤之薩克

薩谷站夫撥安應用以歸省便再宜喜舊駐
官兵近經將軍明亮撤安俄坡查俄坡與甲
索達爾圖路徑相通今宜喜官兵既經撤調
所有該處糧站自應就近改移臣等將宜喜
糧站改安達爾圖俾支領近便且可兼資防
範奏入報

聞

已丑明亮奏言琅谷一道山梁前月三十日臣等

派令和隆武奎林珠爾格德等分隊進發賊人放鎗拋石四面抵拒和隆武官兵將近賊寨即一擁圍裏竭力攻撲奎林從右側抄過賊後攀附而上和隆武等即將迎面賊寨並石城一座立時搶奪而在後一礮已經奎林放火焚燒珠爾格德等繞攻旁插小山腿礮內賊人鎗石如雨適投番阿布僧格太新蒙

恩賞給三等侍衛並戴花翎感激圖報即與霍爾甲

阿咱拉喊諭守卡之賊各賊番旋四散奔逃即分
兵佔住大碉乘勢搶上琅谷與奎林和隆武合為
一處於琅谷趕立營盤七座是晚派兵順梁而下
將斯底葉安寨落攻得十分之四並溝北之克爾
瑪寨落業已焚燒大半計此次共攻奪戰碉六座石
城木城七座賊寨三十餘處賊人逃遁之外滾跌
崖礮者甚多查納木迪官寨現於琅谷趕運大礮
轟摧最為得力俟牆垣小有殘破即發兵攻取並

肅清克爾瑪斯底葉安之後其曲碩木一角即可置之不論至琅谷上連扎烏古隨處有路可通而沿山上下聲東擊西逆酋未必能有多人盡為守禦而以我全力向隙而登但得佔據要隘則將賊人甲索下通之路從中截住自可勢如破竹奏入

上諭軍機大臣曰明亮之兵莫能從扎烏古下至河沿即與勒烏圍緊對於隔河用礮轟擊賊衆自難久支

亦足為阿桂之助至攻打琅谷賊碉時降番阿布僧
格太喊諭守卡之賊甚為出力著明亮即傳旨賞給
緞二疋以示獎勵

甲午阿桂豐昇額海蘭察額森特奏言查勒烏圍
巢穴官兵竭力攻圍惟因第五層礮下與轉經樓
往來及沿河過渡之路未經截斷而勒烏圍轉經
樓兩處碉卡之外又尚有前此攻而未克之寨落
及轉經樓北之木城皆能聯絡接應其迤南之科

布曲山腿及迤西隔河賊卡內鎗礮皆可相及而
近日各處敗回賊人及噶拉依一帶之賊全聚于
此尚思逞其螳臂臣等于二十九日夜分兵攻打
乘勢挈柵二座至三十日夜又派普爾普瑚尼爾
圖保寧官達色烏爾納等分兵五隊攻搶勒烏圍
轉經樓及各寨落木城又派福康安烏什哈達等
分兵兩隊自北而南合攻勒烏圍並派兵由第四
層礮上乘各處攻打緊急之時挈柵前進查第四

層礮相距第五層礮沿不過十餘丈若從官兵所
駐柵內刨挖地道斜下亦可突出第五層礮上槍
挈柵卡佔斷賊人往來之路因於八月初一日夜
即派普爾普烏什哈達等督率官兵並另派兵分
打各礮房寨落以混賊人耳目初一初二兩夜官
兵已得兩道地穴挖進數丈有餘將斜出第五層
礮上臣等復派各領隊鎮將帶兵七隊於初三日
夜分攻各礮寨官兵漸次挖進不無稍有聲息賊

人知覺亦從旁挖掘地穴相拒因乘夜又挈木柵
三座直至第五層礮沿之上臣等思福康安烏什
哈達等所駐之地在勒烏圍西北若從伊等前此
所挈木柵沿河灘接挈前進一過勒烏圍官寨繞
而東南與我兵剗挖地道之處相對則礮上礮下
皆有官兵圍逼不但賊人水路既斷即陸路更難
竄逸當又砍運木植於初五日派定普爾普等分
段挈柵福康安那木扎等帶兵勦殺來援之賊至

初六日黎明共挈木柵二十六座已與勒烏圍官寨東西平對是夜又接挈前進而轉經樓一帶賊人見勢危迫攢集二三百人悉力衝突侍衛薩爾吉岱穆哈納等帶領埋伏預備之兵直前衝殺烏什哈達亦即帶兵合擊殲斃甚多官兵又隨時挈起二十餘座初七日夜復接挈十三座賊番兩次衝擾均被我兵擊退與所創地道之處相對不過一箭之地不但賊人白日不能行走即夜間偷越

亦屬甚難查前此以地勢所限我兵圍困賊巢雖已逼近而沿河正西一面既未能斷其水路正南轉經樓一面又但及第四層礮而止故賊尚恃為有路可逃今臣等沿灘所拏木柵向南已過勒烏圍官寨復折而向東距第四層礮上木柵已彼此鎗箭可及即此相距之地再行接拏木柵刨挖深濠賊雖悉力死鬪然從此合圍使無一賊得脫亦足以稍快人心

同日阿桂豐昇額又奏言查甲雜官寨係在河西
居噶拉依勒烏圍之中臣等現從西路進攻須俟
攻克科布曲後向南再攻過數道山腿下至沿河
過渡始可至其地以河西形勢而論自甲索而下
為扎烏古又南為阿爾古又南至來達木又東南
斜下始為甲雜中間相隔更遠此時實無可以繞
往甲雜擒拏逆酋之路至甲爾日磔橋一處原係
勒烏圍噶拉依往來要路勒烏圍賊衆竄回必由

于此一佔此橋自難存住但此橋在科布曲山腿
之下欲佔此橋必先佔此山腿是以前此臣等一
面攻打勒烏圍一面即議佔據此處以扼賊人歸
路但此山腿上賊人卡柵緊密守禦甚嚴而山形
險仄陡峭又難攀援而上故雖經海蘭察額森特
帶兵跣水過河攻而未克今自勒烏圍轉經樓賊
人皆有木城石卡層層聯絡而甲爾日礮橋又處
轉經樓及科布曲山腿中間且對河阿爾古之賊

鎗礮亦皆可及實係四面受敵之所官兵不但難
以往攻即使冒險前往佔奪仍難據守是以于勒
烏圍轉經樓中間為柵橫截之計指日大兵一
克勒烏圍則轉經樓之勢已孤賊人自不能再守
而甲爾日磔橋亦必不攻自潰至科布曲山腿俟
攻克勒烏圍時抽出官兵由章噶及達思爾寨等
處覓間下溝繞登科布曲山梁之上庶可壓取均
奏入

上諭軍機大臣曰阿桂等奏連夜分攻各碉寨沿河接
挈木柵已與勒烏圍東西平對如此兩路合圍賊衆
斷難支禦諒可立時攻克乃賊人猶復悉衆死守固
屬護巢力拒亦由其罪孽深重必待盡殲而後已至
既得勒烏圍則轉經樓之賊自難存任即甲爾日磔
橋亦當自潰其科布曲賊寨據脫出番人供稱莎羅
奔弟兄三人現俱在彼自即應乘勝攻克悉行擒獲
從此進攻更不慮後路有賊滋擾至於索諾木現住

甲雜阿桂進攻時自當分兵兩路一由雍中喇嘛寺
攻打噶拉依擣其巢穴一派兵徑赴甲雜官寨擒其
逆酋方為妥協

戊戌明亮奏言查琅谷上接日斯滿再上即為甲
索琅谷之上日斯滿之下總名斯底底葉安其地層
層高礪每礪高下自七八尺至丈餘不等日前雖
將寨落攻得十分之四悉行燒燬而未得之上截
賊人復於坡礪中間自西而東連築木城六座與

納木迪相為犄角若由琅谷搶上扎烏古山梁賊
即在後牽制以撓我兵臣等公同商酌從琅谷西
北發兵先將斯底葉安所餘賊寨盡掃一空乘勢
將日斯滿山梁佔據則納木迪旁無救援更可不
攻自潰隨派奎林等由左抄攻賊寨和隆武等由
右抄攻賊寨並派珠爾格德等由溝北直取克爾
瑪所餘寨落至初十日子刻督率前進官兵齊抵
礪下以手相接而上賊人望見即施放鎗礮我兵

尚未搶近賊寨之下而露身礮上先受鎗傷其勢
再難進步隨令將各路官兵撤回伏念臣既得沙
爾尼之後本擬從甲索發兵下攻實為正辦因前
此和隆武所帶官兵逃至半途阻於雨雪又察看
形勢一由碾占南去一由巴扎木直下賊人防守
甚嚴而統計現有兵數不敷調用是以中止今斯
底葉安納木迪既難力取若不將扎烏古山梁上
緊攻克截出其前則自達爾圖以下後路尚未肅

清即留防各山梁卡隘兵丁皆難抽撤以資打仗
現在賊衆為數日少不過移東補西暫為支抵惟
伺甲索賊人稍減可以進兵即當挑選精銳兼程
前進務將扎烏古上截山梁搶佔自上下壓如攻
至日斯滿其溝內各賊寨可以不煩兵力奏入

上諭軍機大臣曰明亮奏和隆武一路之兵既屬正辦
即應令其相機直進因何忽而中止行軍固當慎重
而過慎則蕙今阿桂統領官兵已直壓勒烏圍計日

可馳捷報而明亮至今未能下至河沿豈甘心讓西路獨成大功而北路竟不思稍展寸長乎至阿桂處攻勒勒烏圍前以其久攻未下諭令派兵渡河前往勒烏圍對面遙為犄角昨阿桂已從福康安等駐兵之所接孛木柵直與第四礮官兵遙對業將勒烏圍四面圍攻此時正需多兵會勦自毋庸復分兵渡河但既得勒烏圍以後阿桂仍即須派兵過河幫同明亮將扎烏古山梁及納木迪斯底葉安一帶賊卡悉

行掃蕩引令明亮至河沿會同進勦則後路更覺肅清
尤可安心直進

同日富勒渾郝碩劉秉恬奏言西路密拉噶拉木
一帶臺站由勒赤爾寨至勒烏圍大營計程五十
餘里應安兩站每站仍照後路各安夫一千名由
遜克爾宗至拉枯喇嘛寺計程六十餘里亦應復
安兩站每站只須各安夫三百名其遜克爾宗以
後之瓦角站駐卡官兵均已調撥前進應將舊安

臺站裁撤其人夫等項移設新添之拉枯喇嘛寺
站至西路自楸砥至軍營截至八月初五日止共
存米五萬八千餘石而南路協濟北路之米自六
月二十七日起至七月十六日止共發運木池米
一萬五千石是北路之米既有南路協濟無虞缺
乏而西路之米自得益見充益所有北路卓克采
舊存糧石應趁此時趕運薩爾赤交收以免堆積
一俟攻得勒烏圍添站需夫即將此站人夫就近

抽撤更為便捷至西路礮局去年原係西路進兵
是以南北山梁分安兩局今大兵現抵勒烏圍而
勒爾赤寨與遜克爾宗南路官兵業已會局亦應
歸併臣等現與建昌道白瀛查于巴占山梁適中
之處安設礮局就近鑄造奏入報

聞

平定兩金川方畧卷一百二十二